

**Inatsisartut isummerfigisassaattut siunnersuut, Naalakkersuisut peqquneqassasut  
Angalallutik immikkut suliaqartussanik pilersitseqqullugit, immikkut atuartitsinermut  
tapersiinermik suliaqartussanik tassani sineriammi atuarfinni ilinniartitsisut  
aaliangersimasut immikkut atuartitsinerat qaffassarniarlugu.**

(Inatsisartunut ilaasortaq Nivi Olsen, Demokraatit)

### **Akissuteqaat**

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

### **Siullermeerneqarnera**

Naalakkersuisut Inatsisartunut ilaasortaq Nivi Olsen, Demokraatineersoq, aalajangiussassatut siunnersuutaanut qujassuteqarfigaat.

Naalakkersuisut isumaqtigaat, immikkut atuartitsinerup iluani piginnaasassat pisariaqartut Kalaallit Nunaanni tamarmi pigineqarnissaasa qularnaarnissaat ajornakusoortoq.

Taamaattorli atuarfimmi ilinniartitsisut ilinniakkamikkut ingerlaavartumik ineriartortinnejarpuit, aamma ilinniartitsisut immikkut ilisimasallit, meeqlanik timikkut, isumaliortaatsikkut inooqatigiinnermilu assigiinngitsunik unamminartorsiortunik atuartitsisartut. Atuartut taakkua pineqartut atuarfimmi specialklassini aammalu klassini nalinginnaasuni atuartinneqartarput.

Ilinniartitaanermik Aqtsisoqarfik nalinginnaasumik immikkut atuartitsineq pillugu pingaartumik najukkani ataasiakkaani ingerlaavartumik pikkorissartitsisarpoq. Ilinniartitaanermut Aqtsisoqarfik Ilinniarfissuarlu ukumi atuarfiusumi 2019/20-mi qitiusumiit pikkorissartitsinernik, atuartunut immikkut pisariaqartitsisunut immikkullu atuartitsineq pillugu sammitinneqartunik, neqerooruteqarput, taakkuali Covid-19 peqqutigalugu taamaatiinnarneqarput.

Taakkua saniatigut Ilinniarfissuup immikkut atuartitsinermi ilinniarnermi atuarsimasassat piumasarisat annertusineqarput. Ilinniarfissuup specialpædagogikkimi diplomitut ilinniarsinnaaneq aamma pilersinnikuuaa. Ilinniarnermi tassani sammineqartartut immikkut ittut, meeqlanik immikkut pisariaqartitsisunik atuartitsinermi naammattuugassaasut, qanoq pissusilorsorfiginissaat ilinniartut ilinniagarisarpaat, soorlu eqqarsartaatsikkut, misigissutsikkut inooqataanikkullu ajornartorsiutit.

Aammattaaq taaneqassaaq Isumaginninnermik Aqtsisoqarfik immikkut pisariaqartitsisunik isumaginninnermik sulialinnut pikkorissaanernik immikkoortukkuutaanik aamma piginnaasanik nalilersuinernik ingerlataqartarpoq.

Taakkununnga peqatigitillugu taaneqassaaq, atuarfimmi immikkut atuartitsinermut specialpædagogikkimilu ikorsiisarnermut akisussaaffik tamakkerluni kommuninut 2012-imi nuunneqarmat, taamanikkut kommunit PPR/MISI-mut tunngasut tigummassuk.

Kommunit tamarmik PPR-eqarfegarput, psykologinik immikkullu ilisimasalinnik assigiinngitsunik sulisoqartunik. Taakkua angajoqqaanut immikkullu ilinniagalinnut, meeqqanik inuuusuttunillu 0-imiit 18-inut ukiulinnik sullisisunut, paedagogikkimi psykologiimilu siunnersuinermik neqerooruteqartarput. Taamatuttaaq Ilinniartitaanermut Aqutsisoqarfip 2018-imi “Meeqqat atuarfianni immikkut atuartitsisarneq aamma allamik immikkut ittumik perorsaanikkut ikorsiisarneq pillugit ilitsersuut” suliarivaa. Ilitsersuummi tassani “Meeqqat atuarfianni immikkut atuartitsisarneq aamma allamik immikkut ittumik perorsaanikkut ikorsiisarneq pillugit Namminersorlutik Oqartussat nalunaarutaat nr. 21, 8. december 2017-imeersoq” nassuiarneqarpoq. Ilitsersuut kommunit suleqatigalugit suliaavoq.

Naalakkersuisut isumaqarput kommunit tamarmik immikkut atuartitsinerup iluani sunik pisariaqartitsinertik namminneerlutik nalilersussagaat, Ilinniartitaanermullu Aqutsisoqarfik Ilinniarfissuarlu suleqatigalugit atuarfimmi immikkut atuartitsinermi piginnaasanik tulluartunik inerisaallutik.

Taamaattumik Naalakkersuisut siunnersuut akuerineqassanngitsoq inassutigaat.